

**Au casino de Bagnères** *P.Abadie « Coundes gauyous de nouste »* **139**

Més tout qu'a ue fî aci-bach e que calou pensa à s'en tourna. Lous poulàstres, las garies, lou yamboû, lou lard, tout qu'ère cracat. E lou barrau que dechabe escoula, fî, fî, las darrères larmes dou picapout. Lou darrè die, la Choune que boulou hesteya drin lous sués pensiounàris, e que y abou û suplimen de frico au disna. Dab û bèt cap de moutoû, croumpat lou maytî au marcat, qu'ous hesou û poutàtye sabrous. Qu'ous aprestè û fricandèu dab carottes d'Astè, à s'en chuca lous dits dinque las timplegues. Enta roustit, qu'ous apari sencles coustétes de betèt d'ue liure cadue. Û boû cafè dab û beyroulèt d'Armagnac, per dessus tout aquét fristi, e mouns òmes que-s lhebèn de taule plâ urous e que-s anèn passeya. Aquét sé, que y abè grane hèste au Casino. Lous dus coumpays que lunàben û moumén à trabès lous balustres de la riche barrère. Milès de luts enlugarnantes qu'esclayrèben, coum en plé die, lou parc e las parets de la bastisse.

-Be déu esta beroy deguens, si hasou à la fî lou Chiroulet ! Quoan déu cousta d'entra ? - Quarante tàryes, tè, si respoun lou Bernicha. Més aném, puch que la hèm, hém-la ! Douma nou bagara pas ! E touts dus qu'entrèn. Qu'ère lou permé cop qui pausaben lous pès en û tiàtre e nou sabèn pas qu'aquiu que calè escouta sense dise arré. Que credèn de poudé batala coum debat l'emban dou Titou, oun lou Yan de Clèr bien youga quauquecop dab las soues mounaques. Puch, qu'èren drin escauhats e qu'estoun empertinens dab lou Coumissàri qui-us boulou hè cara. Tant y a que-s hesoun hica dehore dab û berbau cadu. Lou dissàtte puch que calou pourta las culotes deban lou yùtye de pats. Moussu-ou Yùtye de Bagnères que counchè lous dus coumpays.